

Қазақстан Республикасының Үкіметі мен Қырғыз Республикасының Үкіметі арасындағы Мемлекеттік шекара арқылы өткізу пункттері туралы келісімді бекіту туралы

Қазақстан Республикасының 2005 жылғы 3 наурыздағы N 34 Заңы.

Астанада 2003 жылғы 25 желтоқсанда жасалған Қазақстан Республикасының Үкіметі мен Қырғыз Республикасының Үкіметі арасындағы Мемлекеттік шекара арқылы өткізу пункттері туралы келісім бекітілсін.

Қ а з а қ с т а н
Президенті

Р е с п у б л и к а с ы н ы ң

**Қазақстан Республикасының Үкіметі мен Қырғыз Республикасының Үкіметі арасындағы Мемлекеттік шекара арқылы өткізу пункттері туралы
КЕЛІСІМ (2009 жылғы 22 қыркүйекте күшіне енді - Қазақстан Республикасының халықаралық шарттары Бюллетені, 2009 ж., № 5, 32-күжат)**

Бұдан әрі Тараптар деп аталатын Қазақстан Республикасының Үкіметі мен Қырғыз Республикасының Үкіметі,

1997 жылғы 8 сәуірдегі Қазақстан Республикасы мен Қырғыз Республикасының арасындағы Мәңгілік достық туралы шартты, 1998 жылғы 25 қарашадағы Достастыққа кірмейтін мемлекеттермен жасалған Тәуелсіз Мемлекеттер Достастығына қатысушы мемлекеттердің шекарасы арқылы өткізу пункттерінде шекаралық бақылау саласында шекара маңындағы әскерлердің ынтымақтастығы туралы келісімді және 2000 жылғы 30 қарашадағы Беларусь Республикасының Үкіметі, Қазақстан Республикасының Үкіметі, Қырғыз Республикасының Үкіметі, Ресей Федерациясының Үкіметі және Тәжікстан Республикасының Үкіметі арасындағы азаматтардың өзара визасыз сапарлары туралы келісімді дамыту үшін,

Қазақстан Республикасы мен Қырғыз Республикасының арасында тату көршілестік, достық және ынтымақтастық қатынастарын дамыту үшін қолайлы жағдайлар жасау мақсатында, өзара экономикалық қауіпсіздікті қамтамасыз етудің өмірлік маңызы бар мүдделерін негізге ала отырып,

тең құқықтық пен өзара тиімділік қағидаттарының негізінде ынтымақтастық пен сауданы барынша дамытуға арналған жағдайлар жасауға ұмтылысты, заңсыз көші-қонды, қару-жарақтың, оқ-дәрілердің, есірткі құралдарының, психотроптық және улаушы заттар мен прекурсорлардың контрабандасын анықтау және жолын кесу

мақсатында қазақстан-қырғыз мемлекеттік шекарасы арқылы адамдарды, тауарларды және көлік құралдарын өткізу тәртібін жетілдіру қажеттілігін басшылыққа ала отырып, мына төмендегілер туралы келісті:

1-бап

Қазақстан-қырғыз мемлекеттік шекарасы арқылы адамдарды, тауарлар мен көлік құралдарын өткізу үшін Тараптар осы Келісімнің ажырамас бөлігі болып табылатын Қосымшада көрсетілген мемлекеттік шекара арқылы көп жақты және екі жақты өткізу пункттерін (бұдан әрі - өткізу пункттері) орналастыруды шешті.

Тараптар өз мемлекеттерінің ұлттық заңнамаларына сәйкес Тараптар мемлекеттерінің азаматтары үшін жеке өткізу пункттерін орналастыруы мүмкін.

Көп жақты өткізу пункттері Тараптар мемлекеттерінің және басқа да мемлекеттердің адамдарын, тауарлары мен көлік құралдарын өткізуді жүзеге асырады.

Екі жақты өткізу пункттері Тараптар мемлекеттерінің адамдарын, тауарлары мен көлік құралдарын өткізуді жүзеге асырады.

Өткізу пункттерінің жұмыс тәртібі Тараптар мемлекеттерінің шекаралық, кедендік және басқа да мүдделі органдарының арасында келісім бойынша белгіленеді.

2-бап

Тараптар мемлекеттері өткізу пункттерінің жұмыс режимі осы Келісімге Қосымшаға сәйкес белгіленеді.

Өткізу пункттерінің жұмыс режимі мен тәртібінің сақталуына бақылау Тараптар мемлекеттерінің ұлттық заңнамаларына, өздері қатысушысы болып табылатын халықаралық шарттарға сәйкес белгіленеді.

3-бап

Адамдарды, тауарлар мен көлік құралдарын шекаралық, кедендік және басқа да бақылау түрлері (бұдан әрі - бақылау) Тараптар мемлекеттерінің ұлттық заңнамаларына және өздері қатысушысы болып табылатын халықаралық шарттарға сәйкес өткізу пункттерінде жүзеге асырылады.

Қажет болған жағдайда, Тараптар бірлескен бақылау жүргізу үшін жағдайлар жасайды. Бірлескен бақылауды ұйымдастыру мен жүзеге асырудың тәртібі Тараптар мемлекеттерінің шекаралық, кедендік және басқа да мүдделі органдарының арасындағы жеке уағдаластықтармен айқындалатын болады.

4-бап

Өткізу пункттерінің тиісті қызметін қамтамасыз ету үшін Тараптардың әрқайсысы өз мемлекетінің аумағында қажетті инфрақұрылым құрады.

Егер өткізу пункттерінде бірлескен бақылау жүргізу мүмкіндігі көзделген жағдайда, өткізу пункттерін жобалау мен құрылысын салу Тараптардың өзара келісімі бойынша жүзеге асырылады.

5-бап

Өткізу пункттерін ашу және жабу немесе олардың мәртебесін өзгерту Тараптармен дипломатиялық арналар бойынша келісіледі және осы Келісімнің ажырамас бөліктері болып табылатын жеке хаттамалармен ресімделеді және аталған Келісімнің 10-бабына сәйкес күшіне енеді.

6-бап

Ерекше жағдайларда Тараптар мемлекеттерінің шекаралық және кедендік ведомстволары өзара уағдаластық бойынша белгіленген бақылау тәртібін сақтай отырып, мемлекеттік шекара арқылы адамдарды, тауарлар мен көлік құралдарын жұмыс істеп тұрған өткізу пункттерінен тыс өткізуді жүзеге асыруы не өткізу пункттері арқылы қозғалысты тоқтатуы мүмкін.

Мұндай шектеулерді енгізетін не өткізу пункттерінен тыс қозғалысты белгілейтін Тарап оларды енгізудің жоспарланып отырған уақытына дейін 24 сағаттан кешіктірмей себептері мен оларды қолдану мерзімдерін көрсете отырып, екінші Тарапты дипломатиялық арналар бойынша хабардар етеді.

Тараптар бірін-бірі объектілерді өткізу пункттерін немесе коммуникациялық құрылыстарды жоспарлы жөндеуге (қайта құруға) байланысты мемлекеттік шекара арқылы жекелеген өткізу пункттерінде қозғалысты шектеу немесе тоқтату туралы жұмыстар басталғанға дейін 30 тәуліктен кешіктірмей хабардар ететін болады.

7-бап

Осы Келісім Тараптардың өздері қатысушылары болып табылатын басқа халықаралық шарттар бойынша құқықтары мен міндеттемелерін қозғамайды.

8-бап

Осы Келісімге Тараптардың өзара келісімі бойынша Келісімнің ажырамас бөліктері болып табылатын жеке хаттамалармен ресімделетін және аталған Келісімнің 10-бабында көзделген тәртіппен күшіне енетін өзгерістер мен толықтырулар енгізілуі мүмкін.

9-бап

Осы Келісімнің ережелерін қолдану мен түсіндіру жөнінде даулар және келіспеушіліктер туындаған жағдайда, Тараптар оларды келіссөздер немесе консультациялар жолымен шешеді.

10-бап

Осы Келісім Тараптардың ол күшіне ену үшін қажетті мемлекетішілік рәсімдерді орындағандығы туралы соңғы жазбаша хабарламаны алған күнінен бастап күшіне енеді.

Осы Келісім бес жыл бойы қолданылады және егер Тараптардың бірі кезекті бес жылдық мерзім аяқталғанға дейін 6 айдан кешіктірмей өзінің оның қолданысын тоқтату ниеті туралы екінші Тарапты хабардар етпесе, кейінгі бес жылдық мерзімдерге өздігінен ұзартылатын болады.

Осы Келісім Тараптардың бірі екінші Тараптың тиісті жазбаша хабарламасын алғаннан кейін алты ай өткен соң өз қолданысын тоқтатады.

2003 жылғы 25 желтоқсанда Астана қаласында әрқайсысы қазақ, қырғыз және орыс тілдеріндегі екі данада жасалды, әрі барлық мәтіндер бірдей күшке ие.

Осы Келісімнің ережелерін түсіндіру мақсаттары үшін орыс тіліндегі мәтін пайдаланылады.

Қазақстан Республикасының
Үкіметі үшін

Қырғыз Республикасының
Үкіметі үшін

Қазақстан Республикасының Үкіметі
мен Қырғыз Республикасының Үкіметі
арасындағы Мемлекеттік шекара
арқылы өткізу пункттері туралы
келісімге қосымша

Ескерту. Қосымшаға өзгерістер енгізілді - ҚР 28.01.2016 № 448-V; 12.12.2019 № 278 -VI Заңдарымен.

N	Қырғыз Республикасы өткізу пункттерінің атауы	Қырғыз Республикасында орналасқан жері	Қазақстан Республикасы өткізу пункттерінің атауы	Қазақстан Республикасында орналасқан жері	Өткізу пункттерінің мәртебесі	Жұмыс режимі
1	Қарқара - автожолдық	Ыстықкөл облысы Түп ауданы	Кеген - автожолдық	Алматы облысы Райымбек ауданы	көп жақты халықаралық	тәулік-тің жарық уақыты

2	Токмақ - автожолдық	Шу облысы Шу ауданы	Сарытөбе - автожолдық	Жамбыл облысы Қордай ауданы	көпжақты халықаралық	тәулік бойы
3	Кең-Бұлын - автожолдық	Шу облысы Ыстық-ата ауданы	Аухатты - автожолдық	Жамбыл облысы Қордай ауданы	Көпжақты халықаралық	тәулік бойы
4	Ақтілек - автожолдық	Шу облысы Ыстық-атын ауданы	Қарасу - автожолдық	Жамбыл облысы Қордай ауданы	көп жақты халықаралық	тәулік бойы
5	Ақжол - автожолдық	Шу облысы Аламұдын ауданы	Қордай - автожолдық	Жамбыл облысы Қордай ауданы	көп жақты халықаралық	тәулік бойы
6	Камышановка - автожолдық	Шу облысы Соқұлық ауданы	Камышановка автожолдық	Жамбыл облысы Қордай ауданы	екі жақты	тәулік-тің жарық уақыты
7	Шалдыбар - автожолдық	Шу облысы Панфилов ауданы	Сыпатай батыр - автожолдық	Жамбыл облысы Мерке ауданы	көп жақты халықаралық	тәулік бойы
8	Шоң қақпа - автожолдық	Талас облысы Манас ауданы	Айша бибі - автожолдық	Жамбыл облысы Жамбыл ауданы	көп жақты халықаралық	тәулік бойы
9	Кіші қақпа - автожолдық	Талас облысы Манас ауданы	Бесағаш - автожолдық	Жамбыл облысы Жамбыл ауданы	екі жақты	тәулік бойы
10	Қайынды - автожолдық	Шу облысы Қайынды ктк	Шалдыбар - автожолдық	Жамбыл облысы Мерке ауданы	көп жақты халықаралық	тәулік бойы
11	Көпқурай - автожолдық	Талас облысы Қарабура ауданы	Алатау - автожолдық	Жамбыл облысы Жамбыл ауданы	екі жақты	тәулік бойы
12	Жайыл - автожолдық	Шу облысы	Жайыл - автожолдық	Жамбыл облысы	екі жақты	тәулік бойы

Осымен 2003 жылғы 25 желтоқсанда Астана қаласында жасалған Қазақстан Республикасының Үкіметі мен Қырғыз Республикасының Үкіметі арасындағы Мемлекеттік шекара арқылы өткізу пункттері туралы келісімнің қазақ тіліндегі көшірмесінің дәлдігін куәландырамын.

*Қазақстан Республикасы
Сыртқы істер министрлігінің
Халықаралық-құқық департаментінің
Қеңесшісі*

© 2012. Қазақстан Республикасы Әділет министрлігінің «Қазақстан Республикасының Заңнама және құқықтық ақпарат институты» ШЖҚ РМК